

LE
MANIFESTE
ET DECLARATION DE
LA FRANCE A SES ENFANS
Ligueurs & rebelles à leur Roy, avec
admonition de leur deuoir.

M. DC. XV.

[The remainder of the page contains extremely faint, illegible text, likely bleed-through from the reverse side of the document.]



L ny a doute, que le plus souuent les moindres offenses sont les plus plaintives & criardes, & que les plus cruelles estouffent & rauissent les sens des offentez : de la aduint la trāsformation de la malheureuse Nyobe en rocher, par le douloureux resentiment de la perte de ses sept enfans : Mais comme Dieu par sa diuine grace, donne tousiours quelque soulagement à aucuns pour resmoigner sa toute-puissance & que les orages ne tombent que sous son bon plaisir & la ou il luy plaist : Je luy dois loüanges & graces immortelles de la faueur spetiale qu'il ma concedée d'une viue force & capable pour supporter les violences & execrables atantas que j'ay receus depuis plusieurs siecles de ceux mesmes que ie nourris & ne respirent que de ma substance : dont ie me plains comme d'une engeance de vipere qui tient sa perte asseurée au moyen de sa geniture. Et semble que Dieu ait voulu remarquer yn prodige en moy comme il a en la terre sainte & autres lieux qui en dépendent, qu'il a permis estre remplis d'infidelles pour en reietter & exiller les peruers, ingrats & indignes refractaires à sa diuine loy de laquelle ils les auoit douez comme imbuez des sacrées & immenses mistaires de sa passion. Puisque m'ayant par vne grace speciale rendue le premier seminaire de sa loy Chrestienne, il permet que ie

fois habitée à present de la gent la plus pernitieuse & desobeïssante à sa loy (à la plus part) qu'il semble que ie sois la fable non point seulement des terres qui ont ou qui peuvent auoir quelque impression d'icelle: mais des nations les plus éloignées & plus barbares à qui nature seule en distribue plus qu'aux miens qui la doiuent auoir infuse en leur ame, par la cognoissance de celuy qui en est le surgeon.

Les brutes & creatures qui ne sont que sensibles se tiennent exactement dans les termes des loix que nature leur a donnez, les mouches ont vn chef qui à sa seance bien ordonnée en la ruche auquel il n'est iamais attanté, les bestes les plus fieres marchent tousiours à la conduite d'vn, & ne s'aident iamais de leur humeur vorace les vns contre les autres, ils reseruent leurs forces pour conquerir leurs proyes, & pour les hommes qui ne sont participans de la diuine benediction du Ciel, qui ne sont conduits que par vn instinct naturel, ils ne viuēt que par l'obeïssance qu'ils vōyēt en vn Roy: ceux de Canada, des Tapinambous, du Cap de vert, de la Guinée, dont il y a tant de tesmoignages certains, ont à chaque contrée leur Roy, dont ils obseruent inuiolablement les loix, & viuent ainsi en leur condition avec toute sorte de contentement.

Les Turks qui iusques à present se sont maintenus si soigneusement aux termes de l'obeïssance des impies loix de Mahomet, ont par ceste seule prudence humaine planté leurs estandarts par trop auant, & au grand regret des vrayes & fidelles

Chrestiens dans les terres de la Chrestienté. Pour les autres Royaumes Chrestiens qui les environnent encore par leur seule vigilance, ordre bien obserué par le seul instrument de l'obeïssance que les sujets portent à leur Roy, ils nous mettent à couuert des efforts de ses batailles, & par ce moyé les actions de leurs Roys reluyssent tellement que les rebellions leur seroient des prodiges, comme elle sont en toute monarchie bien ordonnée, aussi ces peuples ainsi bien morigenez entretenus en la crainte de Dieu qui les assujettit d'obeïr à leurs Roys qui sont ses oingts, & portent seuls à cause de ce, le tiltre d'enfans du Ciel treuuent vne si suauë nourriture en ce champ d'obeïssance, comme remply de miniere de toutes benedictions de Sábées qui ne leur font feu que de parfums, qui n'aprehendent rien que de s'en esloigner, & comme la differéce de leur composition & vraye humeur Chrestienne rend celles de nos François ridicule, absurde & miserable par la desobeïssance mere d'insolence & violence, & de toutes maledictiōs, qui traine en sa queue la defaite & ruine de toute republique, que Lactāce Firmian met entre les signes precursseurs du dernier iour, ils s'en moquent avec raison. Guichardin l'vn des sages Historiens entre les modernes, quoy que couuertement n'a pas oublié d'accuser les François, entre lesquels toute sorte de police est esteinte d'incapacité de garder aucune cōqueste pour ne se pouuoir seulement seruir d'aucune discipline domestique, pour ce qu'elle ne peut estre obseruée sans l'obeïssance d'vn chef.

L'impression de ce vice si pernitieux, dont leur ame est à mon grand regret par trop atteinte, d'inuincibles qu'ils doiuent estre, les rend si lasches & desesperez en leurs confuses & folles ambitions, qu'ils se deschirent & deuorent eux mesmes, & recoiuent leurs suplices de leurs bourrelles mains, & quand il ne se ressentent point assez puissans pour executer leur cruauté sur eux, ils implorent l'ayde des estrangers pour essayer avec impatience de me rendre inhabitable, pour se vanger & ne sçauent dire pourquoy, sinon que le tout en fin retourne à leur ruine: comme celuy qui crache au Ciel.

Quelques vns se pourroient estonner cōme la verité est tousiours audieuse de ce que ie me plains si librement contre les miens, pour ce que les plus pregnās effets de nature ce font au chatoüillemēt de ceux que l'on a allaiētez: mais comme ie me represente que tousiours ce miserable vice accroit de plus en plus, afin qu'au moins ie n'en puisse demeurer coupable par mon silence, il ne faut plus me taire, & puis ie ne peux dire que ce qui est cogneu à tout le monde, il ne faut que ie fonde mes remonstrāces sur les exemples & histoires du passé, puisque nous en auons de nos propres faicts si ressentis que les playes en sont encores toutes senglātes, & vous prie de cōsiderer (mes Enfans) quel fruiēt vous receuste de la rebellio & attantat execrable, cōmis à la personne du feu Roy Henry III. de bonne memoire (qui n'estoit point mineur, ie dis cecy par ce que aucuns qui se veulent flatter veulent tirer le mal-heur present du bas aage de

nostre Roy) la debonnaireté duquel fut pendant son règne, vn vray cornet d'abondance de toutes richesses, dont l'excez vous engendra vn tel orgueil (suiuy tousiours de l'oubliance de Dieu) que vous consentistes trop au englement, aux auteurs de sa perte & à la vostre: Cōsiderez encore le fruit & le contentement qu'ont receu à la fin les conducteurs complices & adherants de ceste rebellion, & quelle recompense de leurs merites apres tant de bruslemens, sacrileges, sacagemens, viollemens, voire aurât de maux qui s'en peut imaginer en la boëte de Pandore, dont messieurs de Paris peuuent dire des nouuelles autant que toute autre ville de ce Royaume. La cher de cheual, chiens, rats, & fourrits, estoit leur venaisô assez rare pourtant, la Ligue leur fit gouster ces delicieux morceaux, & avec raison ils furent seruis les premiers, comme les premiers ils adhererent à la sedition, & la fin de ceste histoire tragique fut de reuenir flectis aux pieds de leur Roy, ce fut l'extresme-vnction de leur salut. Je veux que la plus-part de ces factieux soient peris miserablement, comme Dieu souuent jette les fleaux du châtiemēt au feu pour les consommer, tousiours vous en auez porté vne tres-dure penitence: Mais ce qui vous rend misérables, c'est que vous vous rendez tellement indignes de la grace de Dieu, que vous ne pouuez estre sages à vos despēs, d'incliner si au englement à ceste presente pernitiueuse Ligue, sans que les effectz sanglans de vostre ruine, ny les mal-heurs qui se presentent deuant vos yeux vous puissent esmouuoir à courir à vostre Roy, qui est le seul astre qui

vous peut faire florir, & quoy que l'on die vous ne trouuerez que toute grace, iustice & clemence de sa Majesté, il est fils d'un pere qui auoit souueraineté de tout reserué de l'offence. Au contraire vous ne trouuerez que des appas suivis d'amertumes de l'autre part, & souuenez vous combien le pretexté de ceste premiere Ligue estoit pregnât fondé sur la religion, & sur l'abondance des subsides, au lieu dequoy l'on leur promettoit des montaignes d'or, comme Satan pour seduire le premier homme luy promettoit l'égalité en son Dieu, & comme au lieu de l'accroissement de la religion, elle fut affoiblie en un instant par la destruction & ébranlement des Eglises & Temples edifiez de temps immemorial à la gloire de Dieu par ceux mesmes qui s'en disoient les protecteurs.

Representez vous en suite de ce, le mépris de la iustice, comme ce grand Senat de Paris le premier du monde, fut mené comme l'on dit à la baguette, par un simple vert de terre en la Bastille de Paris, comme les subsides furent augmentez pour salarier ceux mesmes qui vous auoient outragez, ainsi que le criminel qui paye le bourreau qui le tourmente, vous pouuez iuger cōme après tout cela j'ay esté à la veille d'estre amputée par vne gent estrangere, au moyen dequoy vous estiez assurez d'un exil perpetuel, & bien déplorable du doux pais de vostre naissance, & sans que Dieu vous regarda de son œil de pitié par la mission de ce grand Monarque Henry le grand, exemple merueilleux & inimitable des plus rares vertus qui se peuent imaginer, ainsi que ces faicts Heroïques reluisent
comme

comme vn Soleil par l'vniuers. Apres auoir tra-
 uersé le cours de ses ans en vne mer de peines &
 trauaux au peril des armes, dōpté & vaincu com-
 me vn foudre de Mars, & fait fleschir à ses pieds
 ses rebelles sujets ennemys estrangers, résisté à
 tant d'effroyables troubles & diuisions, remis son
 pauvre peuple (l'ayant pris à mercy accablé des
 orages des guerres) comme dās vn horizon d'Al-
 tions : pour tesmoigner le fruiet de ses labeurs, &
 tesmoigner en tout temps par ses actions, ses mi-
 racles éuidents par le monde, dont Dieu auoit
 voulu decorer & éterniser sa memoire, se disposa
 de tout son cœur de luy en faire & rendre l'hom-
 mage comme sujet à sa seule loy & de nature, à
 laquelle tous Monarques doiuent ployer. De sor-
 te qu'en ayant r'estably quelques loix & fait de
 nouvelles selon la varieté du temps, *ut variantibus*
tēporibus humanaque statuta variari oportet, pour ren-
 dre son œuvre parfait & asseurer la perpetuité de
 son tiltre glorieux en l'azile du Ciel, donna l'ordre
 necessaire à l'establissement de ce qui concerne sa
 gloire & son saint nom, à fin qu'il fust adoré &
 prié par tous ses sujets, avec telle reigle qu'il n'en
 peust arriuer aucun trouble ou tumulte, comme
 contraire à toute pieté & religion, & y proceda si
 saintement qu'il espuisā ses arrosēments si à tēps
 qu'il fit accroistre sa Monarchie avec plus de splē-
 deur & reputation qu'elle ne fut iamais.

Ce grand & magnanime Prince quoy qu'il eust
 esté nourry & esleué dans la terreur des armes, &
 aspreté da la discipline militaire, que par ce moyē
 ses delices estoient le son & armonie des trōpettes

& tambours, & remuement des armes, iugea fort bien que ce n'estoit le moyen d'asseurer vne Monarchie, ny de la reformer (comme font ces esprits broüillons, qui souz pretexte de reformation se sont liguez pour deuorer la substance du peuple) mais il la voulu assurer sur vn plus solide fondement, & comme nous eusmes trop abusé de ceste benediction, & que le trop d'aise nous eut trebuchez aux abismes de vices, Dieu nous a voulu priver de la beatitude qui nous auoit élargie, & tout à coup nous l'osta du monde, qui nous fut vn aussi funeste & deplorable accident qui nous puisse iamais arriuer, au moyen duquel nous n'esperions rien moins qu'vn bouleuersemēt entier de cest estat, l'enuahissemēt d'iceluy, par les estrangers, & par l'ordinaire rebellion & diuision de vous (mes Enfans) du tout enclins principalement à ce vice, sans qu'il pleut à la bonté Diuine en auoir le soin pour regenerer en nostre ieune Roy, toutes les admirables vertus de ce grād Monarque son pere, l'ayant confiée par sa diuine prudēce à ceste fin es mains & a labry des ailles de la grande Royne Regente sa mere, ordonnée d'iceluy sa legitime tutrice, avec l'assistance du plus digne Conseil qui ait iamais esté en France: dont ces Messieurs les pretendus reformateurs sont jaloux & les mordassent d'vne vorace enuie qui suit tousiours, foudroie & éclate contre la vertu, comme son ennemie capitale: Dont il ne se faut par consequent estonner, car tels personnages sont exposez à ses vents, ce qu'ils ne seroient à present s'ils auoient voulu adherer aux bouillantes passions de ses

Messieurs qui ont bieu sceu par diuers moyens, par personnes de diuerses conditions, tant d'espée que de robbe, en fin par vn artifice inique, voire diabolique attirer à leur cordelle le premier Prince du sang, dont fort aisément ils ont embroüillé la ceruelle, l'ayant pris à leur aduantage au feu & comme encor en l'Auril de ses ans se ioüent de son lustre pour pescher en eau trouble.

Mais puisque la vertu consiste en l'action, ie vous prie vous represéter (mes enfans) ce qui c'est ensuiuy, au lieu de naufrage, que nous aprehendions par la perte de nostre grand Roy, & qui nous est succédé par la conduitte de ceste grande Princeesse, & de ce digne Conseil, où est infuse la diuine prudence, car tout aussi-tost l'œil fermé de ce grand Monarque, cōme aux grands maux, il est besoin de grands & prompts remedes, en vn moment ils nous asseurerent, au lieu de l'effroy d'une cruëlle guerre, d'une diuine paix, & pour nous en donner du tesmoignage par le premier fruit de leur labour, ils confirmerent hardiment les precedens Edicts & declarations contenant desfences aux sujets de porter armes à feu, afin de tarir la source des pernietieux desseins des gens de mauuaise vie, & perturbateurs du repos public.

Ceste loy fut tousiours bien obseruée, les gens de bien asseurez dedans & dehors, les campagnes, les chemins libres, & ainsi le traffic & commerce, vn chacun viuoit doucement, & ne se proposoit rien à ceste grande Princeesse & à son dit Conseil, pour la descharge du peuple qui ne fust begnignement receu, comme fut la diminution de cinquante

sols pour minot de sel, quelque offre qui fust faict à sa Majesté de plus de trois cens mil escus par an à son profit, celuy du public y fut preferé, comme aussi l'vtilité des commissions extraordinaires, & Edicts d'office de nouvelle creation, en tant que l'on en iugea à l'oppression du peuple, ils furēt reuoquez par déclaratiō de sa Majesté verifiée, en fin toute apparence de paix & de bien public nous rioit : Mais comme dans le plus calme les orages souuent s'eleuent, ce digne Conseil comme vn fiddle & vigilant nocher est tousiours preparé à repousser les violences du temps, ayant recogneu les mouuemēs de l'insatiable auarice de plusieurs qui pouuoient apporter quelque desordre à leurs fiddlees reglemens, & abuser des ieunes ans du Roy, furent cōtraints de donner aduis à ceste grāde Princesse, de tascher de les assouuir, & qu'il valloit mieux comme vrayes peres de la patrie & du public, prendre deniers aux coffres de sa Majesté, que sur le le pauvre peuple, pour éuiter en vne recheute. Tellemēt que donnans des pensiōs aux vns pour éuiter les effects de leur mauuais courage, il ne failloit mépriser la sincere affection des bons : pourquoy, pour le bien de son seruice. Sa Majesté fut contraincte d'élargir des pensions aux vns, pour leurs merites, & aux autres pour les empescher de faire mal.

En fin à quelque prix que ce fust continuer la paix, comme elle est à desirer, par tous ceux qui ont quelque étincelle de pieté & religion.

Voyla donc superficiallement le proceder de ceste fille du Ciel, pour achepter la paix à ses pauvres

subjects, laquelle pour recompense l'on veut acuser de prodigalité, souz pretexte de quelques liberalitez (communes aux personnes de sa condition, mesmes elles arriuent aux moindres) à aucuns des siens, dont aucun iustement ne se peut scandaliser puisque de droit il n'est permis à qui que ce soit de borner les actions des Princes, quand mesmes ils tendroient à la tyrannye, pour ce qu'il les vaut mieux supporter, & en detourner le cours s'il se peut par quelque artifice doux, que de troubler la paix d'une Monarchie. Dieu élargit quelquefois ces benedictions aussi bien aux mauuais que aux bons. *Sceleratis soloritur piratistique maria patent.*

Pour cela il n'est pas permis se courroucer contre Dieu: il faut dire que sa volonté soit faicte, ainsi il ne faut nous courroucer contre nos Roys: car Dieu conforme leurs mœurs aux nostres. Si nous sommes bons, ils sont bōs, & si nous sommes mauuais, ils le sont aussi, & pour cela leur faire la guerre, s'est s'élever contre Dieu mesme. L'on ne fit la guerre au Roy Louis XI. pour auoir agrandey vn Medecin auquel il donnoit dix mil escus par mois, sans les Eueschez qui donnoit à ses neveux, dont l'une fut l'Euesché d'Amiens, & autres benefices de reuenu, non plus au Roy Charles IX. qui Prince liberal donna à Albert de Gondy, fils d'un Banquier outre les hauts Estats ausquels il l'esleua en deux ans six cēs mil escus, toutes ces liberalitez ne sont riē, au regard de celles des Princes anciens qui ont heureusement regné.

En fin toutes choses alloiēt bien, car ceste grande Princeesse assistée de ce digne Conseil tenoient

tousiours la voye entierement frayé à la paix, dont nous receuions les fruiçts assez abondamment, si nos vices ne nous eussent rendus incapables de les goustier, & n'esperions rien moins que la renaissance de la felicité du regne de Theodose second fils d'Arcadius, qui à l'aage de neuf ans succeda à l'Empire d'Orient, & fut tellemēt esleué à la conduite de Pulcreya sa sœur, secondé de la sagesse d'Anthemius en toute pieté & religiō qu'il exortoït mesme ces ennemys vaincus à la paix, pour aneantir du tout les motifs de la guerre, comme riges de toute impieté, tellement que son heureux repos fut vn exemple d'abondance de bonne loix, ainsi ceste toille nous estoit ja ourdie, ceste beatitude nous estoit preparée, & nous luisoit aux yeux par l'astre vnique en son espece de nostre Roy, du tout craignant Dieu, benin, charitable, toutes ces benedictiōs reluisoiēt en luy, l'arrosémēt en ayant esté espuisé de ce vaisseau de pieté la Royné sa mere. Mais icy bas, & principalement moy pauvre France, ie suis atteinte de ceste vlcere incurable de desobeissance, au lieu d'obeissāce que Dieu a affectée à nos Roys, s'il ne me regarde de sō œil de pitié, ie suis l'aliment de grand nōbre d'esprits violés, turbullés, ambitieux, curieux, rauissāns, qui ne sont que tygres & loups aux hommes, & qui ne cessent d'agiter, troubler & violleter le repos des gens de bien, plus tranquils, & plus doux, comme il y a tousiours en eux des orages, des bourasques, de la contagieuse flame de discorde cachée, ainsi que le foudre dans le ventre d'une nuë, ou le feu dans vn caillou au cētre des affaires de ce Royau-

me : car ces perturbateurs du repos public, ennemys d'iceluy, ennemys de ce bel ordre, ou vn chacun egallement auoit le sien, le pauvre le salaire de son trauail, ces ingrats ainsi que les brutes qui n'ont soin que de contenter leur glouton appetit, comme vn chien, bien que saoul ne pense qu'à du pain, vray source du fleuve de l'esté, ou d'oubly, ayant perdu en vn mesme temps la souuenance des liberalitez & biens faicts à eux rendus par ce grand Monarque, loups qu'ils a nourris & eleuez pour deuorer les siens, mettant au neant les pensions à eux élargis par leur ieune Roy, abusant de ses ieunes ans, & pour prendre leur aduantage pendant iceux, ce sont malheureusement aduisez de se plaindre de desordre en l'estat, pretexte industrieux pour seruir d'appas à captiuer l'esprit d'un ieune Prince qui n'a encore gouté de telle viande, afin de former vne ligue contre leur Roy pour effectuer leurs pernietieux desseins, qui ne tendēt à autre but qu'à deuorer la substance du public, comme ils font encor de present, avec autant de ferocité qu'il s'en peut imaginer aux animaux les plus feroces.

Ceste bonne Princeesse ayant tousiours l'œil tendu au bien de ses sujets pour empescher l'esleuation de ce monstre horrible de sedition, fut conseillée de faire mettre le pied à l'étrier à son ieune Roy à sa conduite, pour aller foudroyer ses rebelles à Mezieres, cōme il y estoit lors assez facile, n'estant encore assistez comme ils sont à present de volleurs (à la plus part) bancqueroutiers, gens de sac & de corde, qui estoient ja demy flestris dās

le Soleil de la paix , & qui ont repris haleine en la faueur des nuages de ces rebellions & seditions, mere nourrice de telles gens : mais elle en fut dissuadée par ce grand pere de Iustice & souuerain Senateur de ce Royaume, incomparable en sa grande douceur , comme vn abregé ou ferrail de toute excellence sagesse, sciéce & bonté, que ie n'exalte point par flaterie : mais selon la verité oculaire, qui penetre tousiours l'obscurité des maudits nuages de calomnie, outre ce que i'en sçay de personnes sans reproche , auxquels il n'a iamais faict ny bien ny mal , lequel comme chef du Conseil de son Roy, en l'absence des Princes du sang, desirant euitier à l'imitation de ce grand Prince Theodore, toute apparence de guerre, l'eleuement des armes comme ny ayât rien de plus perniteux & a craindre pour le bien public , auquel ayant eu tousiours vn zele particulier, que les calomniateurs pensent à present estouffer , & le rendre odieux à ceux desquels il est vraiment le pere, de faict son Conseil fut suiuy quoy qu'il fust seul , & à ce moyé le Roy contraint de traicter avec ses sujects pour auoir la paix par l'entremise peine , labeur & travail de plusieurs notables personages de son Conseil, les plus excellents en l'art & experience de persuader qui neantmoins à peine en peurent tirer aucune raison (tant ces peruers estoïent acharnez à la carcasse populaire) sans que nature fit ses efforts en la preoccupation du naturel du Prince, qui inclina plus aisément au contentement de son Roy & aux repos du public : mais tousiours apres vne grande ruine & desolation, outre grand nombre

bre de deniers qu'il faillut tirer de la Bastille, pour payer leur folle, le tout apres que le chef de leur confusion eut bien remply & gratis ses magazins: car sans cela il n'eust iamais conseillé la paix aussi elle n'a esté que fourrée (côme l'on dit) pour sô regard, car l'avarice ne se rassasie ainsi, ny l'enuie qui luy rauage perpetuellement les mouelles ne le laisse ainsi en repos, il faut tousiours mesler les cartes pour viure aux dépens d'autrui: car comme il a veu que le Prince eut recogneu sa faute, & qu'il se fut bien remis pres la personne de son Roy assisté d'aucuns ennemys de leur aise qui rendoient en vne autre fin, en laquelle ils esperoient paruenir par vn mesme chemin, il fut trouué bon de preoccuper son esprit de grandeurs imaginaires, & que à cela la Chrestienté luy donneroit escorte, & comme il n'y a point d'appas plus subtil que celuy qui est composé avec la drogue d'ambition, il ne leur fut difficile de paruenir à leur dessein, il y presta aussi-tost l'oreille, qui chatouillerent de toutes belles esperances, & pour fortifier leur vain pretexte du public, ils s'aduiferent de demander la vengeance de la mort de ce grand Roy, sans cōsiderer que ceste proposition est aussi ridicule à leur bouche qu'en vn gourmand de prescher l'abstinence, & à quoy ils n'eussent iamais pensé si celuy auquel ils veulent imputer ce miserable parricide eust voulu prendre leur party: Et puis qu'il failloit reformer le Conseil, pour ce que les choses si traictoient contre leurs intentions, qu'il failloit punir l'empport de six millions, & d'aucuns meurtres particuliers, en indignation

de ce qu'ils n'ont Amiés en leur pouuoir , car pour le bien public , ils n'y songerent iamais , mais par trop à sa ruyne, à quoy ils employent comme l'on dit le verd & le sec.

S'il y a de l'apparence à tous ces beaux pretextes , comme non , & ie veux qu'il y en ait , le pauvre peuple n'en doit porter la penitence , sa ruine ne peut apporter aucuns remedes à ceste pretendue reformation , ny à l'acroissement de Monsieur le Prince , car quand il fera la guerre dix ans , voire vingt , il ne sera plus Prince du sang qu'il est , & n'en deuiendra plus riche , au contraire , il diminuë sa condition en cela , il enerue & affoiblit l'Estat auquel il a interest , & s'aygri cōtre luy-mesme , & ne se voit point ordinairement Prince ny seigneur qui ne s'incommode grandemēt à faire la guerre , toutes ces choses leur furent remonstrées par les allées & venuës deynieres qui se faisoient à Soissons de la part de sa Majesté , de la clemēce & bōté , duquel ils abusoiēt tellemēt par remises de conference entr'eux , que l'on iugea qu'ils ne tendoient qu'à illuder sa Majesté , ses intentions , & principalement son voyage de Bordeaux , l'effect d'iceluy quoy qu'il n'eust esté premedité ny resolu que du consentement de celuy du lustre & autorité duquel ils se ioüent , de faict , ils ne manquerent pas à se mettre aux champs , & à rompre la paille aux conferences , si tost qu'ils veirent la lettre du Roy adressante au premier Prince du sang contenant commandement de venir , ils iugerent bien que l'on auoit decouuert leur mauuaise intention , & qu'ils prenoient la clemence de

la Majesté, pour les attirer à la paix, pour mols & timides conseils: c'est pourquoy l'on voit aussi tost vn Manifeste éclos en la religieuse ville de Sedan, qui fut bien tost publié par tout le Royaume, lors vn chacun à qui mieux mieux, se prepare comme lous affamez à deuorer le public, l'on surpřed les villes, l'on impose des subides, l'on rançonne ceux que l'on peut attrapper, & tirent leur excuse & pardon de leurs patricides attantas sur le bien public, & qu'ils font le seruice du Roy, ainsi que le porte leur Manifeste, & quiconque la composé sans doute que c'est vn docteur (quoy qu'aucuns l'appellent Clerc ou Secretaire) mais il ne fut iamais à la Sorbonne: car on luy eust donné l'aduis de se mesler de son art & non des affaires d'Estat, qui ne sont viandes à digerer pour tous estomacs, tel y pense estre sçauant qui y est du tout ignorât, tel reprent ceux qui y sont appelez & viellis qui y seroit bien empesché, puis on luy eust dit, vous ne sçauiez que vous faictes, car vous allumez vn feu aisément que vous ne pourrez d'esteindre, & auquel peut estre vous pourrez le premier estre échaudé, vous ne considerez pas que vous parlez à des gens d'estat qui ont leur azille en la Majesté du Roy, qui sont veuz par l'vniuers, leurs actions exposez aux iugemens diuers d'vn chacun, comme dispensateurs de la clemence & bonté du Roy, ils sont odieux aux meschans, & desirez par les bons, vous donnez des aduis imprudemment & temerairement en vn Prince qui s'en trouuera comme il en sera infailliblement trompé, vous exterminera au lieu de ce que vous esperez quelque

dignité en sa faueur par vostre charlatannerie, il ne faut iamais tromper personne, il faut marcher la teste haute comme font ceux que vous calomniez, & pour ce faire il faut premieremēt craindre Dieu, ce faisant vous obeïrez au Roy, sçachez qu'il faut viure ainsi ou que iamais vous ne iouyrez de la benediction de la paix.

En fin prenez exemple aux Royaumes les plus voisins, portez enuie à leur bō-heur & prosperité, qu'ils épuïsent en ceste source d'obeïssance qu'ils portēt à leurs Roys, les mécontétemens y sont des monstres, & n'y sont pas si tost nez qu'il n'y soient au mesme temps étouffez, nonobstant leur origine, quoy qu'elle fust du sang Royal, car quelque nombre de Prince du sang qu'il y ait en vn Royaume, il n'y a tousiours que le Roy qui est l'oinct de Dieu, à qui il faut directemēt obeïr, tous les autres sont ces sujets: mais les Princes les premiers par-dessus les autres, aussi ils l'appellēt leur souuerain seigneur, voire le premier Prince du sang. Or faire la guerre à sō souuerain seigneur c'est cōtre Dieu, cōtre la loy & cōtre la raison, l'on leur doit seulement le respect & l'honneur, qui est deu aux enfans de la maison, & comme enfans d'icelle ils doiuent l'obeïssance au chef d'icelle, celuy qui assiste le fils à faire la guerre à son pere n'est moins maudit de Dieu que le fils mesme, ainsi est de celuy qui assiste le Prince qui s'éleue contre son Roy, son souuerain seigneur, & neantmoins (mes Enfans) vous faictes de ce vice vertu, qui à la fin si vous n'y prenez garde, vous fera finir miserablement, tant va la cane à l'eau qu'elle y demeure, car

tout ce que ie voy qui menace vostre ruine, est le nombre des malins Esprits, bien plus grands que des bons, qui sont comme les pourceaux qui se delectent en leur fange, ils se nourrissent au desordre, & se rendent incapable de toute impression de bié, & quâd on leur represente le bien des subjects estrâgers par l'obeïssance qu'ils portét à leur Roy, ses loix & ordonnances, ils disent que les François n'ont point accoustumé de viure ainsi, ô malheureuse repartie, odieuse à Dieu & au monde, ô blasphème contre Dieu, comme chose diabolique de perseuerer en son mal, veux-tu toujours croupir en ton ordure, veux-tu toujours auoir deuant les yeux l'image d'une prochaine tempeste, comme le meschant la rigueur de la loy? faute d'obeïr à ton Roy? veux-tu que ton Roy l'oinct de Dieu, qui est vne personne sacrée s'assujettisse aux passions de ceux qui ne le doiuent aborder que le genoüil en terre? veux-tu que son conseil soit ainsi illudé sur des pretextes imaginaires, par la demesurée passion de ces cœurs susceptibles de mescontétemens, tantost l'un veut un Gouvernement, l'un vne Lieutenance, l'autre vne pension, l'autre un respit du mouuement du Roy, pour suppléer au deffaut de son mauuais ménage, pour frustrer ses pauvres creanciers, l'autre est repris de ses insolences doucement au lieu d'une peine de teste qu'il meritoit, & côme il y a un iuste & bien considerable refus de tout cela, & un doux traictemēt, voyla autant de mescontens, qui à la premiere occasion se liguent sur de vains pretextes qui se controuuent pour piller les subjects

de leur Roy, ô le bel ordre, ô la belle humeur François, ô villes & communautéz soyez sages à vos dépens, si vous ne l'estes ou pouuez estre aux dépens d'autrui. Ne croyez point à ces prometteurs de reformatiōs du bien public, ce ne sont que pipeurs, n'écoutez que vostre Roy, obeïssez à ses loix & Magistrats qui ne vous prescriuent que l'ordre d'une sainte paix. Ou est-tu Zaïllaccus législateur qui ne voulut pardonner à son fils, quoy que le peuple l'en suppliait à fin que l'on ne peust dire apres sa mort que la pieté naturelle eust plus de poix enuers luy que l'entretienement des loix, le regne des Monarques de ce temps qui ont suivy ceste sainte erudition, dōt leurs subjets moyssonnent de iour en iour les fruiets de toute felicité sont encore tout recent. N'écoutez dont plus ie vous prie (mes Enfans) ces perturbateurs de repos public, car ils n'ont quoy qui disent que leur particulier interest en recommandation, les derniers termes de leur Manifeste imprimé sur le nom du Prince en fait foy, il demande vengeance du tort qu'on luy fait, & aussi-tost elle se décharge sur le peuple, bref il n'y a que l'ambition & l'avarice qui sont les deux vlcères qui infectent un estat qui les porte en leurs cruautéz, que quand un Roy auroit cent Royaumes, il n'auroit de quoy contéter leur avarice & ambition, il ne faut point selon Dieu ou autrement ce nom de Roy seroit imaginaire, que l'intention & volonté du Roy soit contestée par les siés, il faut trouuer bon tout ce qu'il commande & ordonne, s'il fait des liberalitez aux vns quoy que sās merite, il ne faut point

qu'aucun en conçoie de jalousie, n'y qu'il se refroidisse en l'obeïssance qu'il doit à son Roy, au contraire en augmenter l'effect, gangner ses bonnes graces par augmentation de service, & se rendre capable de ses biens-faiçts, c'est ainsi qu'il faut viure, ceste voye iuste & sainte, est vn moyen pour viure selon Dieu & pour paruenir en vne sainte paix, elle est aisée à tenir, il n'y a qu'un peu d'habitude, qu'un chacun se tienne aux termes de son deuoir & qu'il se represente que ce monde est vn theatre où il faut qu'un chacun face son personnage, duquel Dieu est le seul Autheur & conditeur, auquel seul tout est deu, qui pour la direction de l'estat de la vie humaine, il a diuisé le monde en Monarchie, & en chacun d'icelles créé vn Roy, qui ne dépend que de sa seule loy, auquel il donne puissance sur nos vies & moyens, qui est le tiltre le plus spetieux qui se peut desirer pour marque de souueraineté: car naturelement celuy ce doit humilier à celuy qui a puissance sur sa vie & moyens, où il faut qu'il soit bien surmonté d'orgueil, & pour la conseruation de son autorité Royale direction de son estat, & liaison de la société humaine, il y a donné les armes & les loix qui est la description de la cime imperiale, comme la cause efficiente, pour monstrier que tout ce qu'il luy plaist est equitable, & que la source de toute iustice est infusée en sō ame, tellemēt que nul en son Royaume quel qu'il soit ne doit estre si hardy que de leuer les armes, ny excercer la iustice distributiue sans son autorité, qui sont principes inuiolables en toute Monarchie bien reiglée, dōt

ils tirent le fondement de leur bien, dequoy l'on peut prèdre vne consequence infaillible que toute l'administration d'un estat se diuise en faicts d'armes & de lettres, en acte de guerre & de paix, à ce propos Gabriel Symeon és diuises Heroïques a depeint Iulles Cesar tout debout sur le globe du monde, tenant en la main gauche vn liure, de la droicte vne espée, avec ceste inscription *ex utroque Cesar*, pourquoy l'on tient que la Iustice de guerre faict vne partie du corps de la Iustice, quoy qu'elle soit plus essentielle en ce qui est des lettres, dont procede la loy de Seruius Tullius, sixième Roy des Romains, qui porte que l'estat public subsiste non moins par les conseils & adresses de la paix que par les armes & art de la guerre, pourquoy l'on tient que *parua sunt foris arma nisi consilium sit domi*, de la vient que le Conseil d'Estat du Roy est tousiours composé de personnes qui font profession de l'art militaire: dont les premiers sont les Princes du sang, Connestable & autres officiers de la couronne, avec excellents personnages de longue robe que l'on tire souuent des Parlements & autres Cours souueraines: mesmes l'on y comprend les Presidents desdits Parlemets & les Procureurs generaux de sa Majesté, auquel Conseil president en l'absence du Roy, lesdits Princes du sang selon leur rang & en apres le Chancelier comme souuerain Senateur & chef de la Iustice & y sont reservez comme estant le caractaire des loix & ordonnances, les causes d'estat qui touchent l'ordre vniuersel du Royaume: comme les plaintes qui se font contre les Gouverneurs des Prouinces, Prin-

tes du sang ou autre de la Couronne, & particuliers Gouverneurs des villes, mêmes les plaintes qui se font contre les Cours souveraines, A quoy le Roy seul peut pourueoir sàs que les autres Magistrats en puissent cognoistre, comme de fait, les affaires publiques veuillent des resolutions bien differentes des particulieres:

Et pour les affaires particulieres & exercice de la iustice distributue, les Parlemés & autres Cours souveraines & Magistrats sont establis, la fonction desquels est bien exactement limitée, & distinguée par bonne loix & ordonnances qui ne doiuent estre transgressez, tellement que les Iuges s'ils veuillent ne peuuent faillir, puis qu'ils ont les loix & les regles qui prescriuent l'Estat de leurs iugemens, & doiuent sagement se ramener en memoire le discours que faisoit Pericles, quand il prenoit sa robe de Magistrat pour sortir en public. Pense à toy Pericles, tu commandes à hommes libres, non pas à des escaues, tu commandes à des citoyens qui sont pareils à toy. Ains faut davantage dire en nous-mesmes, tu commande estat commandé & subiect, tu commande sous vn Monarque qui ta prescrit ton pouuoir par sa loy, & ne faut prendre trop de cœur pour l'auoir, il faut regarder les marques des seigneurs qui sont encore par dessus, ainsi que les ioueurs de comedies, qui adioustent du leur au rolle, qu'ils ioient qui est le geste, l'accent, & la contenance, qui leur est conuenable: mais tousiours ils escoutent leur protocole, à fin qu'ils n'excedent ny passent les mesures qui leur ont esté baillées. Or comme ces

Comédiens par l'exacte obseruation de leur ordre donnent vn grand contentement à leurs spectateurs, & par ce moyen acquierent la reputation d'estre excelens en leur profession, ainsi les ministres de Iustice ne peuuent receuoir que de la gloire de leurs actions quand ils en prennent la direction sur les regles inuiolables de leur art, & est plus seant que l'on die d'un Iuge qu'il ait failly avec la loy & l'ordonnance, que d'auoir bien fait de son motif, bien souuent les Cours Souueraines peuuent iuger *ex equo & bono*: mais non aux actiōs dont la decisiō dépend de l'ordonnance du Roy, coustume où loy municipale d'une Prouince, comme à la verité c'est bien estre surmonté de presumption à vn Iuge, & se trop preualoir de son autorité, où de la force de son sens de faire paille du labeur du Prince qui a publié sa loy avec si meure deliberation, & neantmoins ce desordre se voit & se glisse insensiblement au corps de la Iustice, & que alleguer l'ordonnance à vn Iuge, où il dira qu'elle sera vieille ou bien il interpretera à sa fantaisie, & par ces diuers moyens il la rend inutile au des-honneur de son Prince, & au prejudice du public & du particullier. C'est vne erreur de dire qu'une ordonnance est vieille, car elle est tousiours nouuelle & à force de loy si elle n'est abrogée, changée & recogneüe, comme il se peut selon la vicissitude du temps par le Prince mesme, & non pas par quelque mauuais stil de proceder, que la malice des Procureurs ou solciteurs introduisent bien souuent de leur consentement, que les Iuges acceptent insensiblement, mais indigne-

ment en violant la loy, sans considerer que ceste licence d'y déroger, en vn poinct se peut étendre sur vn autre pretexte selon la passion d'un Iuge, lequel auenglé & transporté d'icelle, comme ordinairement elle se demesure iusques à nous reduire à quelque fureur, qui produit vn feu sans étincelle de Iustice. C'est pourquoy Dieu à voulu qu'elle soit bornée de l'autorité des loix, dont les Iuges ne doiuent estre que protocole, & luy apporter du lustre conuenable par la sincerité de leurs actiōs, comme s'ils estoient auteurs de la chose mesme, & qu'ils soient semblables comme dit saint Basille au chapitre d'Esaye, à ceux qui se veullēt rendre digne d'entrer en chaise, qu'ils soient d'une vie irreprehensible, comme destinez pour seruir de lumiere & d'exemple pour reprendre les vices, & rendre la Iustice à vn chacun, qu'ils soient doux & accessibles, à fin de ne rebuter les parties à demander Iustice, outre qu'il n'y a nul plus digne d'estre hay que celuy qui ne veut point qu'on l'aborde. Ostez ces Iuges presomptueux qui pēsent auoir le iugement si subtil qui ne croient moins penetrer dans le cœur des parties, & centre des affaires qu'un Lynx avec ces yeux à trauers vne muraille de sept pieds, ils ne les veulent ouïr, & à peine ils veullent regarder l'entrée du sac pour auoir la reputation de Iuge expeditifs, & ainsi l'iniustice surmonte le iuste. Ce discours ne méloigné de l'effect de ma premiere plainte, qui est en la desobeïssance à nos Roys. Car le principal malheur en procede de l'infraction de leurs loix qui flectrissent dans la fontaine de ceux qui les de-

ueroit faire florir, qui sôt les ministres de iustice sur
 l'honneur & conscience, desquels elles ne sont
 neantmoins confiez. La desobeïssance à nos Roys
 qui nous porte aux rebellions est vn orage, quoy
 que cruel qui passe & souuent n'est pas de durée,
 mais le mal qui prouient de l'infraction des loix,
 qui cause tant d'vlcères au corps de la Iustice, le
 public en est tellement infecté que tout y est per-
 du sans remede, il s'en pourroit faire des volumes
 d'exemples, mais (mes Enfans) i'ay le cœur si trās-
 si des éminentes ruines que vous vous suscitez, si
 Dieu ne vous regarde de son œil de pitié que i'ay
 trop peu d'hallaine pour continuer vn si long dis-
 cours, car des loix que vous méprisez & desquel-
 les l'infraction vous est la plus insensible au corps
 de la Iustice, ce sont les plus abondantes sources
 des miseres publiques, desquels en fin s'il n'y est
 preueniu, les plus haut éleuez ne pourront échap-
 per ce naufrage, les vaines, les muscles & les
 nerfs du corps des Cours souueraines & autres
 Magistrats, sont les loix & ordonnāces des Roys,
 comme la fontaine perpetuelle des droicts & de
 toute iurisdiction, lesquelles viollees rédent leurs
 corps sans aucun effect legitime. Aussi considerez
 mes amys combien l'infraction des loix qui pro-
 hibent la composition desdites Cours de famille,
 dont elles sont à presens composées & de celles
 qui leur prescript chacun en droict soy, leur pou-
 uoir qu'il transgresse & surpasse à chaque mo-
 mēt a apporté & apporte de ruine au pauvre peu-
 ple dont la plus part vieillit & meurt au procez,
 tant au moyen des éuocations qui se fondent sur

les prohibées alliances desdites Cours, que sur les entreprises qu'ils font ainsi les vns sur les autres, faisant paille des loix qui leur limitent leur pou- uoir, d'où pensez vous mes amys d'où vous peut prouenir vostre present malheur, si ce n'est de ce desordre, reuenez doncques à vous, considerez que la protection des loix fait reluire les actions du Prince & florir les Magistrats, & que le premier malheur qui s'epend sur nous, est quand elles sont abandonnées de ceux qui s'en disent les protecteurs, qu'un chacun face sa charge, recognoissez vous les vns & les autres, l'on voit fort peu de lyons en la campagne deuorez par les lyons, des loups par des loups, & pour venir des brutes aux hommes, vous ne voyez point de Turcs au moins rarement defects par des Turcs, des Anglois par des Anglois, leurs Roys ne sont en peine de faire des Edicts pour les duels, & pour cela ils n'en sont moins genereux: Mais les François ne sont ruinez, rauagez & perdus que par les François, le fils trahit le pere, le frere le frere, & ny eut onques aucun droict d'hospitalité assure, vn chacun naturellement cherit sa patrie, mais les efforts de nature en cela ont esté vains enuers les François, qui seuls la rougissent de leur mesme sang, ô profane du premier seminaire de la Chrestienté, apprehendez vous point l'ire de Dieu, non? pourquoy il faut croire que vous voulez mettre en compromis sa diuinité, s'il n'est ainsi au moins en faiçtes vous les actes: Conuertissez vous dont (mes Enfans) reuenez à vous, ne vous laissez ainsi laschement déposseder de l'essence & du tiltre de ce

beau nom François , qui signifie cœur franc fidele & genereux. Il ne vous en reste plus guere que le nom , par la perfidie seule , dont vous vſez enuers vos Roys , qui vous priue en vn meſme temps de la crainte de Dieu , & vous abâdonnent à toutes sortes de vices : car tout ainſi qu'il ne faut point eſperer de raiſon de celuy qui nie le principe , n'y d'eſperance au baſtiment qui ſe deſtruit par ſon fondement , ainſi celuy qui oublie le premier reſpect qu'il doit naturellement à ſon ſuperieur ne peut plus promettre qu'une vie vitieuſe & dereglee : mais comme la moindre étincelle du feu qui reſte dans vne cendre peut renaître vne flame tres-viue par le moindre ſoufflemēt de l'air , ainſi s'il vous reſte comme il vous peut reſter , (puisque la nature ne perit iamais entierement qu'avec ſa cauſe) par la moindre lueur dans les tenebres de vos rebellions de l'aſtre ſacré de voſtre Roy vous en pouuez receuoir vne clarté plus luyſante que iamais , qui vous fera veoir florir ce beau luſtre François , par le moindre rayon de la grace de ſa Maieſté , laquelle vous fera élargie quand vous l'implorerez , & lors vous vous pourrez dire la plus heureuſe nation de la Chreſtienté , prenant voſtre eſtre ſur la plus ſacrée ſaincte & heureuſe lignée de vos Roys qui eſt de Bourbon , dōt le ſurgeon n'eſt moins canonizé au Ciel qu'en la terre. En fin il ne vous manquera que la bonne volonté , autremēt i'imploreray tous les Elements à mon ayde pout vous exterminer comme ingrats perfides & deloyaux à voſtre Roy , & à voſtre patrie.

